

Schaine klap

CC-Polder

Ain kollegô van vrouger har t nogal ais over 'een opmerkelijke coincidentie'. Man was van n aldernoaste haaiden van aine daag op aander n streng geleuvige kerkgaanger worren. k Wait t nog hail goud. Hai kreeg verkeren mit n ofgeschaaiden maaid oet Olhoof en wer nog fiener den gemoalen poppestront; slaang har sproken. Hai was omdraaid as n blad aan boom. Aan hom mos ik van weeke terogge denken toun k ien kraand t overliden leesde van Hinderk Kibbelgoaren. n Dag of wat eeder har Aibeltje nog zegd: "Hou zol t aigenlieks mit Hinderk Kibbelgoaren wizen." n Opmaarkelke soamenloop; of, zoas mien vrougere kollegô den zee 'n opmerkelijke coincidentie'. k Har der gain wait van. "Menschain leefde alwel nait meer," roadde ik. Toun net nog wel, moar n dag laoter was e al pijger. Ik leesde doodadvertinsie en zee tegen Aibeltje: "Doe vrougst mie veurige weeke naor Hinderk Kibbelgoaren, nait? Nou, hai is mottje. In ains. Der staait apaart bie, dat ze alderdeegs gain ofschaaid meer hemmen kinnen nemen. Zo in ainmoal; pats boem. Zel die moar overkomen."

Hinderk Kibbelgoaren kwam bie mie oet t dôrp. Zien olders huilen n gruintezoak even wiederop. Gruintezoaken in n boerendôrp harren in dij joaren mainstied n wat aarmoudeg bestoan. Elk har zowat n aigen toentje, waar e wel wat vruchten verbaauwde. Louglu luipen deur nait plat bie gruintewinkel. Hinderks voader zag wel brood in t nationaal-socialisme en wer al veur oorlog lid van NSB. En toun Duutsers ons laand onder vout luipen verzaailde man op t gemaintehoes. As distributie-ambtenoar. Aalgedureg zag je hom mit n zwaart unifôrm aan. Den ging hai noar d ain of aandre soamenkomen boeten t dôrp. Hinderk was bie Jeugdstôrm, moar hai was gain jong dij zo neudeg veuraan lopen mos. Dat hai zok ien unifôrm boetendeure verteunde was n zeldsoamhaaid.

Ik kwaam der wel ais n moal over de vlouer en altied vuil mie den weer n hail groot petret op van Adolf Hitler; boven schöstainmandel in keuken.

Lu deden wieder gainaine kwoad. Dij poar onderdoekers harren van heur niks te vrezan. En as ik s oavends ien twijduustern van Jan Pieto kwaam mit n poar vlezzen melk ien fietstaze of n zak waait op pakjedroager, gaven ze mie wis nait aan. Moar mit bevraaiden wer hai deur n haile ploug BS-ers oet hoes hold. Aarms boven kop Ien motorziespan. Even loater huilen aandre BS-ers Hinderk en zien moeke op. Jong har kop zowat tussen scholders. Hai schoamde zok sikkom ogen tou kop oet. k Har dik meedlieden mit hom. Wat har e misdoan? En hou old was e? Vieftien joar. Wie waren om en bie gelieke old. Mensken oet t aandre enne van t dôrp, dij heur hoes deur n voltrefter onbewoonbaar worren was, kwamen in Kibbelgoarens woonderij. Hinderk en zien voar werren achter slôt en grondel zet ien Carel Coenraadpolder. Moeke wer vasthollen in Winschoot; ien n noodzaikenhoes. 't Duurde joaren veur ze terogge kwamen. Hinderk verhoesde vot noar stad; net as ik. Wie zaten op zulfde bôrgerschoule. Voak wazzen wie bienander. Hai was kôstganger bie n hailsoldoat aan Beemsterweg en ik har onderdak bie moeke Van der Sluus in Kiekentjestroade. Traauwen dee e nooit. Hai bleef altied slim op zokzulf. t Waas net of hai oorlog en bevraaiden nait verwaarkt har. Proaten wol e der nooit over. Loater leesde ik ien n boukje van n domie Van der Voart Smit, dat t ien CC-polder nogal roeg tougoan har. Der waren alderdeegs n poar doodhaauwen. Kampkommedant wer zulfs veroordaaild tot tien moand klontjegat. Opins sloug Aibeltje veur of aaltemet Kibbelgoarens noam op liest ston in dat boukje van Van Gelder over Grunnegers dij mit t Duutsers hollen harren. En as dat zo was, zol t heur nait verboazen as Hinderk der zulm n enne aan moakt har...

RITZ